

आकाशवाणी

- भारत ते अमरीका नै यूक्रेन ते बांग्लादेश च स्थिति बारे चर्चा कीती।
- छत्तीसगढ़ दे बीजापुर जिले च 25 माओवादिएं आत्म-समर्पण करी दिता ऐ।
- भारत ते ब्राजील बश्कार सांझे कमीशन दी 9मीं मीटिंग दौरान जी-20 दे नतीजे बारे चर्चा कीती जाग।
- मेडिकल पेशवरें दी सुरक्षा लेई बनाए गेदे राश्ट्रीय कार्यबल दी पैहली मीटिंग अज्ज होग।
- आई.सी.सी महिला टी-20 विश्व कप चार अक्टूबर सवां शुरू होआ'रदा ऐ।

<><><><><><>

PM-Modi

प्रधानमंत्री नरेंद्र मोदी होरें यूक्रेन च स्थिति सने कुल संसारी ते इलाकाई मसले बारे कल्ल अमरीका दे राश्ट्रपति जो बिडेन हुंदे कन्नै टेलीफोन उप्पर गल्लबात कीती। श्री मोदी हारें गी अमरकी राश्ट्रपति हुंदा फोन आया जेदे दौरान प्रधानमंत्री मोदी होरें भारत ते अमरीका बश्कार व्यापक कुल संसारी सामरिक सांझ-भ्याली प्रति राश्ट्रपति जो बिडेन हुंदी बचनबद्धता गितै सराहना कीती। एह सांझ-भ्याली लोकतंत्र दे सांझे मूल्यें, कनून बवस्था ते लोके-लोके बश्कार तगड़े संपर्क उप्पर आधारित ऐ।

दौनों लीडरें दपक्खी सरबंधें च प्रगति बारै जायजा लैता ते आखेआ जे भारत ते अमरीका बशकार सांझ-भ्याली दा मकसद दौनों मुल्खें दे लोकें दे कन्ने-कन्ने समूलची मानवता गी फायदा पजाना ऐ। दौनों लीडरें बांग्लादेश च बनी दी स्थिति बारै बी चैंता जाहर कीती। उनें बांग्लादेश च कनून बवस्था परतिये बहाल होने, अल्पसंख्यकें खास करियै हिंदुएं दी सुरक्षा यकीनी बनाने पर जोर दिता। उनें क्वाड सने होरनें मंचें उप्पर साथ-सहयोग गी होर तगड़ा करने दी बचनबद्धता गी फही दोहराया।

<><><><><><><>

Chhatisgarh-Maoists

छत्तीसगढ़ दे बीजापुर जिले च 25 माओवादिएं आत्मसमर्पण करी दिता ऐ। उनें जिला पुलस सुप्रींटेंडेंट ते केंद्री रिजर्व पुलस बल दे डीआईजी हुंदे अग्गे हथियार छोड़ी दित्ते। इनें माओवादिएं पर कुल 29 लक्ख रुपें दा ईनाम रक्खेआ गेदा हा। इंदे चां 3 माओवादिएं पर 8-8 लक्ख रुपे, 1 माओवादी पर त्रै लक्ख रुपे ते 2 होरनें माओवादिएं पर 1-1 लक्ख रुपे दा ईनाम रक्खेआ गेदा हा। पुलस अधीक्षक होरें दस्सेया जे आत्मसमर्पण करने आले माओवादिएं गी छत्तीसगढ़ सरकार दी आबादकारी नीति तैहत 25-25 जहार रुपे दी रकम दिती गेई ऐ।

<><><><><><><>

S. Jaishankar

विदेश मंत्री डॉ. एस जयशंकर ते ब्राजील दे विदेश मंत्री माउरो विएरा अज्ज नमीं दिल्ली च भारत-ब्राजील दे सांझे कमीशन दी 9मीं बैठक दी सह अध्यक्षता करंगन। ब्राजील दे विदेश मंत्री चऊं दिनें दी जातरा पर शनिवारें नमीं दिल्ली पुज्जे हे। विदेश मंत्रालय नै आखेआ ऐ जे श्री विएरा हुंदी जातरा कन्नै भारत ते ब्राजील बशकार रणनीतिक सांझेदारी गी होर बढ़ावा थहोग। मंत्रालय नै आखेआ जे डा. जयशंकर ते विएरा होर दस्संगन जे त्रोंइका दे रूपै च किस चाल्ली दौनें मुख्य रलियै पिछले बरे भारत दी अध्यक्षता च जी-20 सम्मेलन दे मुख-मुख नतीजें दी दिशा च अगगे बदी सकदे न। जी-20 दे अध्यक्ष दे रूपै च ब्राजील दा कार्यकाल नवंबर 2024 तगर ऐ। ब्राजील दी जी-20 अध्यक्षता तैहत जी-20 त्रोंइका च भारत, ब्राजील ते दक्खन अफ्रीका शामिल न। ब्राजील दी मेजबानी च इस बरे 18 ते 19 नवंबर गी रियो डी जेनेरो च जी-20 मुख्यें दे लीडरें दा शिखर सम्मेलन होग। एहदे थमां पैहले जुलाई च विदेश मंत्रालय दे आर्थिक सरबंधें कन्नै जुड़े दे मामलें दे सचिव दाम रवि हुंदी अगुवाई च भारतीय प्रतिनिधिमंडल रियो-डी जेनेरो च जी-20 मुख्यें दे विकास सरबन्धी मंत्रिणं दी बैठक च शामिल होआ। इस दौरान स्वच्छ भारत अभियान, जल जीवन मिशन ते अमृत योजना सने भारत दे मुख्य विकास कार्यक्रमें दा जिक्र कीता गेआ ते पानी ते साफ-सफाई कन्नै जुडवे दे सतत विकास लक्ष्य तगर पुजजने लेई भारत दी प्रतिबद्धता दोहराई गई।

<><><><><><>

National-Task force

मेडिकल पेशे कन्नै जुड़े दे कर्मिणं दी सुरक्षा, उंदे कम्मकाज दी स्थितिणं दे सरबंधें च सिफारिशें गी करने लेई सुप्रीम कोर्ट दी पेठा खडेरी गेदी राश्ट्रीय कार्यबल दी पैहली बैठक होग। सूत्रें मुजब एह बैठक नमीं दिल्ली च होग। भारत सरकार दे कैबिनेट सचिव बैठक दी प्रधानता करंगन। केंद्री गृह सचिव, राश्ट्रीय चिकित्सा आयोग दे अध्यक्ष सर्जन वाइस एडमिरल आर. सरीन, अखिल भारतीय आयुर्विज्ञान संस्थान दे डरैक्टर डॉ. एम. श्रीनिवास ते एम्स दे न्यूरोलाजी दिआं साबका प्रो. डॉ. पदमा श्रीवास्तव इस कार्यबल दे मिम्बरें च शामिल न। सुप्रीम कोर्ट नै इस कार्यबल गी त्रै हफ्तें दे अंदर अपनी अखीरी मुकदी रिपोर्ट दाखल करने लेई आखेआ ऐ।

<><><><><><>

IMD

मौसम सरबंधी मैहकमे नै दक्खन गुजरात, कच्छ ते सौराश्ट्र च बड़ी भारी बरखा होने दी पेशनगोई कीती ऐ। मौसम मैहकमें उत्तरी गुजरात ते दक्खनी राजस्थान च बी भारी बरखा दी संभावना जताई ऐ। मैहकमे नै गोवा, कोंकण, मध्य महाराश्ट्र, ओडिशा, झारखंड, बिहार ते मंगा कंडे आहले पच्छिम बंगाल च कल्लै तोड़ी भारी बरखा दी संभावना जताई ऐ।

<><><><><><>

France-Telangana

फ्रांस दे राष्ट्रपति इमैनुअल मैक्रॉन होरें आखेआ जे टेलीग्राम दे संस्थापक ते मुख कार्यकारी अधिकारी पवेल दुरोव दी पेरिस च गिरफ्तारी एल्ले चला रदी न्यायिक जांच तैहत कीती गई ऐ ते एह राजनैतिक फैसला नेई ऐ। इक सोशल मीडिया पोस्ट च श्री मैक्रॉन होरें आखेआ जे फ्रांस अभिव्यक्ति दी आजादी, संचार, नमिएं काहड्डें ते उद्यमकारखानादारी दा समर्थन करदा ऐ। उनें आखेआ जे पवेल दुरोव दी गिरफ्तारी न्यायिक जांच कारण होई ऐ ते एह राजनैतिक फैसला नेई ऐ। फ्रांस दे ऐहलकारें 24 अगस्त गी पेरिस च उसी गिरफ्तार करी लैता हा।

<><><><><><>

World Cup Women

भारत आई.सी.सी महिला टी-20 विश्व कप 2024 च 4 अक्टूबर गी दुबई च न्यूजीलैंड कन्ने अपने मुकाबले दी शुरूआत करग ते एहदे मगरा 6 अक्टूबर गी उससै थाहर ओहदा मुकाबला पाकिस्तान कन्ने होग। भारत दा त्रिया मैच 9 अक्टूबर गी दोबारा दुबई च श्रीलंका कन्ने होग। समूह स्तर पर भारतीय टीम दा अखीरी मुकाबला 13 अक्टूबर गी शारजाह च साबका चैंपियन आस्ट्रेलिया कन्ने होग।

महिला टी-20 विश्व कप दा आयोजन पैहले बांग्लादेश च होने आहला हा, पर 2 हफ्ते पैहले इसी संयुक्त अरब अमीरात च करोआने दा फैसला लैता गेआ। इस प्रतियोगिता दे दऊं सेमीफाइनल मैच 17 ते 18 अक्टूबर गी दुबई दे शारजाह च खेड्ढे जांगन, जिल्ले के खिताबी मुकाबला 20 अक्टूबर गी दुबई च होग।

<><><><><><>